

四庫全書

史部

欽定四庫全書

史部

皇朝通典卷五至
七

編修臣李傳熊覆勘

總校官編修臣程嘉謨

欽定四庫全書

皇朝通典卷五

食貨

五

水利上

河上

臣等謹按三代以後言水利者紛紛不一然考其成績率皆補救一時求所謂永遠奠安之計者不

少概見洪惟我

朝

列聖相承念切民依廣興水利凡江淮河漢以及澮瀆溝
渠莫不仰賴

神謨經畫盡善而我

皇上御極以來每參驗盈虛消長之道豫事綢繆不愛
帑不惜工總期瀕水居民登於衽席是以至今河
流順翕海水宴安巨浸之區安瀾永慶洵乎千古
未開之盛業也茲輯水利特分河工海塘為上下
卷詳悉條載以垂後世

順治九年工科給事中胡之俊疏言江浙之蘓松嘉湖地勢汙下所有劉家河吳淞江等處海口壅淤河道成田水患屢告請浚吳淞江以洩陳澱之水浚劉家河以洩巴陽之水從之十一年

上諭東南財賦重地素稱沃壤連年水旱為災民生重困皆因失修水利致誤農功該督撫責成地方官悉心講求疏通水利以時蓄洩庶水旱無虞民安樂利

康熙二年以直隸河間一帶地方夏潦堤岸潰決

莊屯淹沒遣官經理修堤挑淺事宜十一年濬吳江長橋一帶以洩太湖十二年修河南安陽縣之萬金渠引坦水以溉民田二十年清常熟之白茆港武進之孟瀆河二十三年

上南巡閱黃河視北岸諸險工

諭將蕭家渡九里岡崔家鎮徐家壩七里溝黃家嘴新莊一帶喫緊迎溜之處所築長隄與逼水壩時加防護二十五年遣官往淮揚下河督率挑濬車路串

場白駒丁溪草堰場等處河口二十八年

上南巡閱視中河至支河口下馬坐隄上出河圖

指示諸臣

諭曰朕觀此河逼近黃河之岸且自徐州北鎮口閘所出黃水及微山湖荊山口之水俱歸內運河必流入中河駱馬湖之水亦入此河萬一黃隄潰決中河黃河必將混而為一又

諭若重載與回空之船並行則中河窄狹且逼近黃河朕

意猶以為可慮鎮口閘微山湖等處水大仍可開支河口其黃河運道原自不廢仍並存之三十六年

諭漕河督臣會勘下河積水作何盡令歸海洄出民田之處一一議奏尋據漕運總督桑格疏言下河為洩水入海之區自淮安以至邵伯鎮計運河東岸共有涵洞三十牕十滾水壩八運河及高郵邵伯等湖水由諸涵洞牕壩之口歸入射陽廣洋等湖以至白駒岡門等口入海緣下河受水之處甚多而洩

水入海之口猶少是以易於停蓄下河州縣均受其害宜疏濬各口以分水勢從之三十七年桑格又疏言開濬分水之法一請修芒稻河分高郵邵伯兩湖之水入江一請挑曹家灣湯家絆七節橋使通高邵兩湖淤塞達芒稻河以入江一請挑車兒埠之溜子河使泰州所受積水由苦水洋以入海一請挑澗河分運河之水入澗由射陽湖以入海一請挑海陵溪使高郵所受之水通岡門以入

海一請挑車路白塗海溝三河使興化所受之水
由丁溪草堰白駒以入海一請挑蝦鬚二溝憂梁
河并滕隴河西淤塞之射陽湖使高寶興泰鹽山
等處之水由廟灣以入海經部臣議定如所請行
直隸霸州新安等處水行汎濫旗民莊盡沒

上以保定府南之水與渾河會流而渾河為源甚微每遇
大水橫流淤沙壅塞以致田土沖沒又以漳河支
流經大城縣入子牙河其勢湍悍遂

命直隸巡撫于成龍河督王新命察勘隨遣旗下壯丁備器械給以銀米挑濬分疏於是修清河子牙河官隄民隄共千五百二十餘丈三十八年

上南巡閱視高家堰等隄

諭治河上策誠能深濬河底則洪澤湖水直達黃河至於黃淮二河交會之口過於徑直所以黃水常逆流而入今宜將黃河南岸近淮之隄更迤東長二三里築令堅固淮水近河之隄亦迤東灣曲拓築使之斜行會流則

黃河之水不至倒灌入淮矣又

諭朕自淮南一路詳閱河道測算高郵以上河水比湖水
高四尺八寸自高郵至邵伯河水湖水始見平等應將
高郵上下隄岸俱修築堅固有月隄處照舊存留至邵
伯地方河湖合而為一不必修築隄岸將湖水河水俱
由芒稻河人字河引出歸江下河自可不必挑濬矣四
十年淮河道總督張鵬翮請挑蝦鬚二溝淤塞之
處四十餘里挑鮑家莊至白駒地高水壅之處八

十餘里挑撈魚港淤塞之處八十餘里挑老河口
淤淺之處三里有餘挑滔子河三十餘里四十二
年

上南巡閱視河工

諭歸仁隄引河用以分洩洪澤湖之水勢若黃水加長則
恐清口水弱著將祥符閘下板堵閉草壩將五堡閘酌
量開放以助清水之勢四十四年

上南巡閱視河工

諭從前駱馬湖口設竹絡壩湖水大則從壩流入黃河河水大則溢流入壩內今止有湖水暢流黃水並無浸灌則黃河之水深通可知矣

諭河工已經告成善後之策更為緊要修建天妃閘甚當若遇倒灌即暫時下板蓄清水全力以敵黃流其惠濟祠一帶可相度形勢修建挑水壩三四處其王公隄亦應相度修建運河東隄應行加幫高郵淮安隄岸卑薄之處修建石工黃河南岸隄工應加謹修防至直隸山

東之河與河道總督相距甚遠應交與該省巡撫就近料理又

諭九里岡隄工不似從前直埽不能挑溜今修魚鱗埽逐段挺出逼溜開行此法甚善其埽工釘樁處可再建挑水壩二座四十六年

上南巡閱視河工

諭古今治河形勢不同舊時常患清水不敵黃水每有黃水倒灌之虞今清水敵黃有餘運河清水甚大反流入

高郵湖設高郵湖水長溢入運河則運河東隄受險今
應將大墩分水處西岸草壩再加挑寬大使清水多出
黃河一分少入運河一分則運河東隄不致受險又於
蔣家壩開河建閘引水由人字河芒稻河入江新修五
里滾水壩由下河及廟灣等處入海不惟洪澤湖之水
可以宣洩而盱眙泗州積水田地亦可漸次涸出水小
則下板蓄水以敵黃水大則啓板洩水且便於商民舟
楫往來其祥符閘口門甚窄狹趁此黃水不甚高之時

將歸仁安仁利仁三閘委幹員改寬洩水則徐州一帶民田可無淹沒之虞矣

上又以江南之蘓松常鎮浙江之杭州嘉湖各處或近太湖或通潮汐民田可資以灌溉

諭工部行文督撫於該處所有河渠水口度田建閘隨時啓閉其有支港淤淺者並加疏浚仍行建閘四十八年
濬寧夏之宋澄堡李洋堡二渠引黃水助塘渠建
閘壩十三座以灌田畝

雍正二年

詔修濬杭州西湖尋據總督滿保疏言錢塘仁和海寧三縣田畝數萬頃賴城外上下兩塘河水灌溉兩塘河之水源自西湖西湖三十餘里內民人占為田蕩阻遏水道每年銀米納於官者甚微而損於民者甚鉅應清出歸湖將淺涸淤塞及葑草之處開濬芟除以復故址則湖水不致涸竭而三縣民田旱潦有備至於城內之河昔人設筓鑿溝引西湖

之水入城然後由桃花港響水閘會流於上下兩塘以溉田畝今當相其淺深量請開浚庶幾水利可復從之三年

特命怡親王大學士朱軾察勘直隸水利繪圖進呈四年命設營田水利府以怡親王董其事於是於灤州玉田諸州縣濬流築圩建閘開渠招民人願耕者官給帑銀以為工本募江南浙江老農導之耕種其濬疏圩岸以及瀦水節水引水戽水之法俱因地乘勢

次第興修又分立營田四局一曰京東局一曰京西局一曰京南局一曰天津局局各有長有副有効力委員凡開渠建閘皆委員與地方官偕而查報地數花名給發工本則專屬之地方官水田既成令地方官遵前規而以時達之嗣又議設營田觀察使二員副使二員出資經理所有舊田園渠閘並時加修理五年河道總督齊蘇勒副總河嵇曾筠漕運總督張大有河南巡撫田文鏡山東巡

撫塞楞額陝西巡撫法敏等先後奏稱黃河自陝
西府谷縣歷山西河南山東至江南之桃源縣河
水澄清上下三千一百餘里綿歷三旬有餘陝西
山西始自四年十二月初八日至五年正月十三
日凡三十有六日河南山東自四年十二月初九
日至五年正月初十日凡三十有一日山東單縣
亦始於十二月初九日至二十二日凡十四日江
南始自十二月十六日至二十三日凡七日俱以

漸復舊其清自上而下復舊自下而上諸王大臣
合詞奏稱為從來未有之瑞懇請

陞殿受賀

上不允所請專遣祭告

景陵並遣大臣致祭

河神內外大小官員各加一級羣臣恭請

宣付史館

御製碑文勒石得

旨允行是年

上以江浙水利凡附近太湖及通江潮之處曾經

聖祖親臨指示動帑興修

特遣副都統李淑德原任山東巡撫陳世倌等悉心踏勘

大興築濬又

諭太湖之水歸海劉白二河為要必逕直深廣順下暢流
方能一勞永逸但潮汐堙塞太倉常熟士民佔耕日久
今當盡去新漲地畝以復故道尋據李淑德陳世倌等

疏言蘇松常鎮水道並藉太湖為吐納西北承宜興荆溪百瀆之水西南承杭湖苕霅諸山溪之水而皆由三江以入海一自吳縣之鮎魚口經蘇郡之婁門至太倉之劉河出天妃牆以入海是為婁江一自吳江之長橋出瓜經港由龐山湖經長洲青浦以至上海合黃浦以入海是為吳淞江一自白蜆港過澱泖湖會杭嘉諸水入海是為黃浦江實太湖之尾閭關七郡之休戚誠疏其下流自不

至泛濫貽害民田請先挑吳淞江白茆河孟瀆德勝九曲河其餘諸河俟完工之日以次開濬從之又議修揚州五塘以溉民田又以陝西鄭渠白渠龍洞三處民田向引涇水灌溉年久漸致淤塞命督臣岳鍾琪疏浚建牕七年以高家堰當湖河之衝非堅固高厚不能障護清水敵黃以助暢流之勢乃發帑金百萬堅築石工以垂久遠是年

上以甘肅寧夏地瘠渠工為萬姓資生之策

特遣侍郎通智等董率該地方官屬開濬渠道嗣議定蔡罕托輝地方開鑿大渠二百七十餘里建進水石牆一座退水石牆三座尾牆一座大支渠百餘道小陡口百餘道牆旁設水手以司啓閉又建大石牆一座以通漢唐二渠之出水渠東築長隄三百餘里隄岸種柳盤固以障黃河之溢渠西疏濬西河三百五十餘里以洩漢唐二渠並大渠餘水灌漑新渠寶豐寧夏平羅各縣民田又開濬六羊渠

一百二十餘里建進水石牘一座退水石牘二座
開大支渠二十餘道小陡口一百餘道牘旁亦設
水手以司啓閉

上賜名大渠曰惠農渠改六羊渠名潤昌渠八年又以大
清漢唐三渠舊設專員每年修理今歷久廢弛堤
閘損壞

命通智等查勘及時補修又

命於瓜州疏勒河上流築壩開渠濬安家窩對岸導渠引

水十一年修揚州之范公堤又於陝西之桑遠堡
鎮夷堡及口外雙樹墩開渠溉田十二年於甘肅
口外柳林湖地建隄開渠又於陝西之中衛縣白
馬寺灘開渠建槽以資灌溉

乾隆元年

諭直省凡古堤舊渠不為田害便當仍舊毋妄改作凡
督撫各官建言為民興利或因小而害大或利在目
前而害伏於後或有利無害而其事難求皆宜熟籌

慎之於始又

諭管理水利河臣及瀕河州縣各於所屬境內相視河流淺阻每歲農隙募夫修浚定為章程三年

特遣大理寺卿汪濬總辦江南河道工程尋據汪濬疏言山陽阜寧之漁濱河興化縣之白駒閘下引河高郵州之通湖橋馬飲塘河江都之灣頭河通州分司所屬十場鹽河通州之黃河洋范公堤及鹽城之新興場河阜寧之廟灣場河俱宜及時修疏

從之五年

命廷臣會議淮揚九屬水利事宜汪瀝言淮揚下河九屬水利有二最甚者開放高郵三壩次則東邊易進鹹水請將高郵三壩及昭關壩子嬰壩平撤另添石閘三座以殺水勢其鹹水易進處惟天妃與白駒三閘為甚應將天妃口閘及白駒三閘並行拆修其沿范公堤之丁溪小海諸閘內有上岡北草堰二閘移建於串場河口外又請挑浚淮揚各

屬東塘河道加築范公堤以及枰茶斜角二場隄
工又揚子橋開口過高請令改修其九屬田畝之
毗近河渠者請兩岸修築田圩以作隄防俱從之
時江寧布政使晏斯盛請興修鳳潁滁泗四屬水
利疏上發汪漕會同督撫詳勘定議尋議定肥城
內之金斗河及洩水越河虹縣之枯河頭亳州之
乾溪溝和州之太洋河姚下河牛屯河含山之銅
城閘河來安之龍尾壩河俱淤淺不足灌溉均當

開堰疏濬其餘各州縣陂塘溝渠圩埂土壩共六十二所飭地方官量民力能否次第舉行又河南巡撫尹會一請興豫省水利並浚賈魯河下游入渦會淮安慶巡撫陳大受亦言上游之水奔流下注渦河淺窄恐不能容復令汪瀆會督撫定議瀆言賈魯河入淮之水既分洩以入江南之渦河則渦河亦當分洩入淮庶上游下游兩得其平於是浚賈魯河并濬渦河南岸入淮之漳河七年江水

漫溢

命直隸總督高斌前往經理賑恤旋

命大學士陳世倌會同高斌辦理水利尋疏言淮揚徐

海鳳潁泗七屬為百川聚滙高寶諸湖承洪澤湖

之下游自邵伯以上入海自邵伯以下入江而入

海不如入江之便請於金灣壩下添滾壩三座分

引湖水入於鹽河即於鹽河對岸挑引河一道并

挑鳳凰橋下引河及壁虎橋下寥家溝歸石羊河

以達於江至董家溝原歸芒稻河當令挑深自為
一河直注於江其泰州河內之秦塘港白塔河百
汊港改建閘門以時啓閉此導湖水入江之路也
黃河北岸微山湖為上流之瀕駱馬湖為下流之
瀕而中河為咽喉六塘河又承駱馬湖之下流歸
場河以入海今應將板浦以下場河及六里車軸
等河一律疏濬武漳義澤六里河頭各建石閘以
時減洩鳳泗諸州澮沱灘為大而沱河久淤應將

宿州之水導入澮鳳靈之水導入濉不使仍入沱
河為患海州諸水沂沭為大應將河身淤塞者濬
深民堰殘缺者堅築以通積水其餘七府州屬支
河溝渠應修理者百四十餘處並請次第興修俱
從之八年准高斌請於直隸桑乾河南北兩岸開
大渠一道引水以溉民田九年尚書訥親請修理
江南清水下游河道於是濬泰州鹽河及高寶二
湖相連之華家灘大新河高邵二湖相連之王家

港茅塘港邵伯通運之引河循次灌注為湖河遞減之法濬鹽城以南南北二串場河白駒閘下引河及洩水之蚌沿梓新車路白塗海溝興鹽界河東西官河以資利導其范隄各閘多添金門會各引河以廣出水之路又疏濬通州境內任家港等處以備宣洩又准御史柴潮生請經理畿輔水利特遣尚書劉於義往保定會同高斌疏浚河間天津二府河渠浚泊十年

諭江南海州沭陽一帶連年被水朕詢問巡撫陳大受
據稱海州之水下苦於鹽河之南北橫截使六塘南
北之水不得東流上苦於沭河之水盡由沭陽海州
入海宣洩不及以致為害欲去海州之水下當去鹽
河橫截之弊上當分洩沭河之源等語著尹繼善白
鍾山委負查勘應作何開通疏浚之處妥協辦理務
使水患悉除尋據尹繼善等議定修濬濰河南北兩
岸黃疇橋等處河道建設涵洞潁州府肥河宋湯

河蒙城茨河北淝河堰淺築埂建設橋梁以清上
江之水下江六塘河承駱馬湖之水至沭陽分南
北兩股入鹽河歸海令接築南北塘河子堰建設
涵洞疏濬諸處港河築堰建閘至山陽之吉家橋
河鹽城之九曲河阜寧之橫溝河放生河清河之
民便河史家蕩古河安東之龍家蕩河桃源之劉
老澗積水河海州之薔薇河逐一挑濬築堰立閘
又於鹽河下之武障義澤六里三河口各設滾水

石壩贛榆之三公河園子河疏去淤滯以洩異漲
大沙河旁築子堰以資捍禦工竣後定凡各處長
隄巨川大橋大閘歸官修理其支河小港民堰路
溝分隸廳汎州縣各官經管督勸居民以時修整
從之十二年又令加築沭河堰工疏濬宿遷桃源
境內兜灣河接建駱馬湖尾閘永濟石橋四十丈
開濬上下引河以助分洩又建甘泉縣東西灣二
處滾水石壩築范公隄一千一百餘丈十三年

諭江南淮海一帶州縣近年屢被災傷推原其故皆由山東沂鄆等處雨水盛漲建瓴而下遂直注駱馬湖衝決六塘河兩岸子堰淹浸民田著大學士高斌左都御史劉統勲會同撫臣阿里衮將本省近年致患之由並將來作何查辦悉心定議尋據高斌等疏言運河受漳衛汶泗沂之水兩旁承以諸湖其間山泉支港閘壩涵洞橋梁斗門皆有關於蓄洩應將德州哨馬營滾水壩落低以消漳衛之盛漲海豐之馬頰河聊城之徒駭河

疏導以分運河之漲東平之戴村二壩落低以減運
河漲溢之水濟寧之董家口引入白馬河歸湖濟運
以衛民田沂州之江楓口堅築堤壩使入湖歸運以
免旁溢山東之運道泉湖安流順軌即下游淮海
之地無憂濫漫矣疏入如議速行十六年

上南巡周覽河工

諭洪澤湖上承清淮汝潁諸水匯為巨浸所以保障者
惟高堰一堤天然壩乃其尾閭伏秋盛漲輒開此壩

洩之而下流諸縣胥被其害冬月清水勢弱不能刷
黃往往濁流倒灌在下游居民深以開壩為懼朕親
臨高堰循隄而南越三滾壩至蔣家牕周覽形勢乃
知天然壩斷不可開近者河臣又請於三滾壩外增
建石滾壩以資宣洩不知增三為五即以過水一二
尺言之向過三尺者即五尺向過六尺者增而至丈
是與天然壩名異實同亦當為之限制上年滾壩過
水三尺五寸天然壩仍未開放應即以是為準於是

於天然壩立石永禁開放其五壩以仁義禮智信
為次仁義禮三壩一如其舊智信二壩則於石面
之上加封浮土如仁義禮三壩已過水三尺五寸
不足減盛漲則啟智壩之土仍不減乃次及於信
壩永著為例至高堰石堤南滾壩以南舊用土工
石隄有首無尾亦令自新建信壩北雁翅以北一
律改建石工又

諭朕經過淮安見城北一帶內外皆水雖有土隄為之

防而人烟湊集之區設經異漲其何以堪亟應改建
石工以資保障著該河臣督撫確勘詳估及時建築
又准大學士傅恒請於京師高梁橋迤西近河地
畝營治水田十八年七月淮水盛漲洩洪澤湖五
壩泛車羅潰二閘下河高寶興胥受其患至九月
會黃河復決銅山隄南注靈虹諸邑歸洪澤湖奪
淮而下

特命舒赫德劉統勲等督率往來堵築均於歲冬合龍

河流順軌又於高堰武家墩迤北築磚工隄堰千
餘丈以資捍禦二十一年黃河漫溢孫家集楊錫
紱請疏荆山橋河身以洩滕嶧等縣積水二十二
年

上南巡親莅河干

指示一切疏洩捍禦機宜時微山昭陽諸湖俱已疏通
而駱馬湖隄堰殘缺不足禦運河盛漲於是並
築駱馬湖隄又以六塘河以下餘潦停積桃源宿

遷諸窪地多成巨浸山東之金鄉魚臺等屬未涸地
畝尚有十餘莊江南之宿遷靈璧及河南之永城
夏邑等處漫衍地界不下數百里經山東巡撫鶴
年奏報即

命鶴年速赴荆山橋偕白鍾山及侍郎夢麟籌濟寧金
鄉魚臺滕嶧五州縣水勢復

遣侍郎裘曰修馳視山東河南上江各屬積水在山東
者與鶴年會商在河南者與圖爾炳阿會商在上

江者與高晉會商其地方官有熟習水道之員聽其酌量差委並

飭裘曰修夢麟尹繼善白鍾山嵇璜張師載及各督撫先後勘明各工權其輕重緩急就最要者同時並舉餘亦次第興修均於歲內告成於是自濰河以上堅閉毛城鋪諸閘使不得洩黃水以壅濰河而於潁亳一帶及虞夏商永各屬幹河支河一律疏導以洩中州諸河去路並挑兗州之府河洸河改

金口閘涵洞為減水閘改楊家壩為石閘浚伊家河洩微山湖水入運又築堵沂水不使入運以免沛縣旁溢添設昭關滾壩又建高郵運河東隄石閘酌定水則以時啓閉浚芒稻閘越河以闢湖河歸江之路又於微山湖口洩入荆山橋一帶支河專派道員駐劄隨洄隨挑以暢下游之勢是年又於高堰南岸添甃石隄明年又築北岸土隄二十四年浚山東曹單二縣與江南豐沛二縣之順堤

河開常熟昭文二縣之白茆河徐六經海口及塘
外淤河其上游舊有石閘移建於開壩之處以資
蓄洩又濬河東之衛河泉源二十五年准尚書嵇
璜請開運河東堤金灣壩下引河改低董家溝等
三壩准陳宏謀請改常熟昭文二縣海口石閘為
滾壩准尹繼善請將南關車邏等壩封土三尺二
十六年黃沁盛漲懷慶府城被淹

命裘曰修馳驛赴豫相導河渠未幾開封水消而河奪

溜楊橋下趨賈魯

復命大學士劉統勲兆惠馳往董築賈魯河奪溜急工
歲冬合龍併添築懷慶城外月隄是年准方觀承
請於易州原泉村建壩開渠於良鄉之雅河廣陽
壯牛琉璃諸河一律開疏以資灌溉又開泰州之
丁溪小梅二閘引河匯全家港歸海開阜寧鹽城
二縣境內之上岡草堰陳家冲三閘各引河匯入
射陽湖歸海又以陳宏謀言濬常熟之福山塘河

二十七年

上南巡

駐蹕蘇城先

命劉統勲兆惠會同河臣詳勘湖河歸江之路劉統勲等勘定標誌

上回鑾取道按閱如所議拓新挑引河下游使有建瓴之勢拆金灣中二閘添建石壩三十丈落低西灣壩四丈其河頭加挑深寬以資利導又

特示宣洩機宜令展拓清口視高堰五壩增水一尺即
開清口十丈為釜底抽薪之策又

命於徐州河隄自甄工止處一律接築甃石十七層以
資鞏固是年以楊廷璋言濬烏程長興二縣淩港
又以湯聘言於南昌縣之富食墟復建石壩護民
田千餘頃是年又以直屬盛漲各處隄堰多被沖
刷准總督方觀承請挑濬停淤水道修築濱河隄
堰以工代賑二十八年方觀承請濬鳳河上游自

南宮以上至閘子口一百二十餘里以工代賑從之又

特命兆惠會同長蘆鹽政達色天津府知府周元理察勘海河其壩口有應行增開之處照展拓清口之制及時籌辦又浚松江太倉等屬水道挑荆山橋舊河二十九年修築安徽無為州墟田隄壩三十年

上南巡

諭前因微山湖蓄水過多瀕湖窪地每致淹浸經崔應階等奏請宣洩微湖以水誌一丈為度於韓莊添建新閘以殺其勢並挑荆山橋以暢其流朕今歲南巡回鑾時舟行所經詢知窪地近多涸出農田耕作有資但湖水暢消亦恐艱於濟運今據楊錫紱奏稱湖內之水須存一丈二尺用至五月八牆底水尚可得四尺餘寸若止存一丈則五月間八牆底水止存二尺六七寸重運難行請交東省河撫可否量改水誌

或將湖口以下數十里河底一律挑濬五尺等語所
奏於漕渠轉輸自有裨益但水誌改加二尺於低窪
地畝有無妨礙及挑深河底是否可行著崔應階會
同李宏詳悉確勘具奏期於漕運民田均得利賴尋
議定將滾壩內機心每空安砌石槽設立板片水
小之年加板攔束其八牯河亦將新淤沙泥儘力
挑佔至舊時河底而止是年濬武進丹陽之孟瀆
等河三十二年

上親省天津淀河隄閘

命自長隄之三里灘莊兒頭止築新隄一道上下銜接
約十餘里衛村民三千戶成膏腴地畝數千頃是
年湖北黃梅隄潰

命自董家口遞江西德化境內通行堅築三十四年從
范宜賓請挑東省運河

命劉統勲德成履勘籌計尋議挑深五尺計工五年而
後竣三十六年永定河暨北運河漫溢

命大學士高晉尚書裘曰修往會總督周元理勘定修理後遂於永定河自山西口外入直隸出蘆溝橋迤下六工悉就泓灣曲處疏直寬槽十餘丈深七八尺其南岸之金門閘北村壩北岸之求賢橋並改灰工齊歸牯牛河六工以下順導東行並築土埝以遏北徙其北運河則自東岸南倉上新築橫隄以衛北倉村莊再建橋座以洩西來之水又疏浚兩減河及東岸引河培築隔淀隄及千里長隄

計動帑五十餘萬又

諭裘曰修疏言近水居民與水爭地之弊浚泊利在寬深其旁間淤地不過水小時偶然涸出乃瀕水愚民貪其肥潤即行佔墾不知所佔之地日增則蓄水之區日減每遇潦漲水無所容甚至漫溢為患在閭閻獲利有限而於河務關係非輕著傳諭各督撫凡有此等瀕水地面除已墾者姑免追禁外嗣後務須明切曉諭毋許復行佔耕三十八年

命將浚河內鴈背壩及鹿疇兩處添建引河又築張家

口上堡圍城東北兩面石壩計百六十餘丈三十
九年黃河老壩口堤工漫溢淹及板閘

命大學士舒赫德馳往江南會同高晉尅期堵築旬月
集事黃河大溜仍由故道歸海四十一年

諭朕從前屢次南巡閱視清黃交會處悉其倒灌之虞
因思若能引向陶莊以北而流則清口通暢庶免黃
流倒灌因未躬臨陶莊一帶閱視是以踟躕昨歲薩
載赴山東行在召見時諭令赴黃河海口上下察看

伊即奏請若於陶莊開挖引河一道使黃水繞北下
注清水益得暢行與朕意相合伊果能遵照指示剔
挑完竣可免黃水倒灌之虞並收清水刷沙之益即
就近險工亦俱化為平穩矣是為全河一大關鍵又
命河臣於新河頭下添石壩一道為重門保障四十三
年豫省儀封考城漫口潰決兩江督臣高晉請將
賈魯河至渦河一帶停淤飭州縣按田照業食佃
之例歸歲修案內疏濬

上以災民不可派累乃截留新舊漕糧三十萬石先後撥運兩淮鹽課及部庫銀五百六十萬

特命大學士公阿桂刑部尚書袁守侗往董其役四十五年

上南巡閱視高家堰隄閘總督薩載請將三堡六堡等磚工加高數尺

上以磚工不若石工之固

命一律改建甃石分年建造又

命嵇璜薩載勘視徐州周家莊至韓家山一帶石工尋
以徐州舊有石隄九百七十餘丈較新築石隄短
少三層

命一律加高十七層其韓家山至奎山一帶隄堰四百
五十餘丈亦

命一律改築石隄直至山脚以垂鞏固四十六年邳睢
南岸魏家莊大隄潰

上飭河道何裕城即行裹護漫口毋使塌寬並一面防

護北河隄工節經下河督臣奏報河湖驟消數尺
黃不為害

諭即令阿桂薩載等籌計經久良策

時阿桂奉
閱視海塘工即令

經理
河務

又儀封北岸曲家樓隄亦潰東由曹縣歸趙

家河至張秋西由金鄉魚臺至南陽湖下注逼近
運河河臣韓鐸即於外灘築壩以冀漫口斷流濟
東道沈啓震即於戴村壩暨分水龍王廟口添築
石壩以防倒灌

上以黃水經過河朔斷無不淤墊之理

諭河臣速赴運河籌辦分洩事宜確勘微山湖水深尺
丈迅速堵築尋以河臣奏報於東西兩壩趕下門
埽追壓堅實壩臺增長高厚金門斷流大溜全歸
引河引河中泓寬深流行迅駛直注六塘河歸海
四十七年南北兩岸漫口先後合龍又陡墊三十餘
丈隨

諭阿桂等於上游南岸改築壩工俾得吸溜歸槽令薩

載於下游潘家屯六塘等處展濶去路並挑微山
湖下顧家莊等處分洩通暢又阿桂等議定自蘭
陽十二堡至商邱七堡南隄外一百七十餘里另
築新堤一道並疏挑引渠導河水下注商邱歸正
河故道入海又奉

諭今年春間豫省青龍岡漫口合龍未就遣大學士阿
桂之子乾清門侍衛阿彌達前往青海務窮河源
告祭

河神事竣復命並據按定南針繪圖具說呈覽據奏星宿海西南有一河名阿勒坦郭勒蒙古語阿勒坦即黃金郭勒即河也此河實係黃河上源其水色黃迴旋三百餘里穿入星宿海自此合流至貴德堡水色全黃始名黃河又阿勒坦郭勒之西有巨石高數丈名阿勒坦噶達素齊老蒙古語噶達素北極星也齊老石也其崖壁黃赤色壁上為天池池中流泉噴涌醜為百道皆作金色入阿勒坦郭勒則真黃河之上

源也其所奏河源頗為明晰從前康熙四十三年

皇祖命侍衛拉錫等往窮河源其時伊等但窮至星宿海
即指為河源自彼回程復奏而未窮至阿勒坦郭勒
之黃水尤未窮至阿勒坦噶達素齊老之真源是以
皇祖所降諭旨并

幾暇格物編星宿海一條亦但就拉錫等所奏以鄂敦他
臘為河源也今既考詢明確較前更加詳晰因賦河
源詩一篇敘述原委又因漢書河出崑崙之語考之

於今昆崙當在回部中回部諸水皆東注蒲昌海即
鹽澤也鹽澤之水入地伏流至青海始出而大河之
水獨黃非昆崙之水伏地至此出而挾星宿海諸水
為河瀆而何濟水三伏三見此亦一證因於河源詩
後復加按語為之決疑傳正嗣檢閱宋史河渠志有
云河繞昆崙之南折而東復繞昆崙之北諸語夫昆
崙大山也河安能繞其南又繞其北此不待辨而知
其誣且昆崙在回部離此萬里誰能移此為青海之

河源既又細閱康熙年間拉錫所具圖於貴德之西
有三支河名昆都倫乃悟昆都倫者蒙古語謂橫也
橫即支河之謂此元時舊名謂有三橫河入於河蓋
蒙古以橫為昆都倫即回部所謂昆崙山者亦係橫
嶺而修名者不解其故遂牽青海之昆都倫河為回
部之昆崙山耳既解其疑不可不詳誌因復著讀宋
史河渠志一篇茲更檢元史地理志有河源附錄一
卷內稱漢史張騫道西域見二水交流發葱嶺匯鹽

澤伏流千里至積石而再出其所言與朕蒲昌海即
鹽澤之水入地伏流意頗合可見古人考證已有先
得我心者按史記大宛傳云于闐之西水皆西流注
西海其東水東流注鹽澤潛行地下其南則河源出
焉河注中國漢書西域傳于闐國條下所引亦同而
說未詳盡張騫既至蒲昌海則或越過星宿海直至
回部地方或回至星宿海而未尋至阿勒坦郭勒等
處當日還奏必有奏牘或繪圖陳獻而司馬遷班固

紀載弗為備詳始末僅以數語了事致後人無從考證此作史者之畧也然則武帝紀所云昆崙為河源本不誤特未詳伏流而出青海之阿勒坦噶達素而經星宿海為河源耳至元世祖時遣使窮河源亦但言至青海之星宿海見有泉百餘泓便指謂河源而不言其上有阿勒坦噶達素之黃水又上有蒲昌海之伏流則仍屬得半而止朕從前為熱河考即言河源自蔥嶺以東之和闐葉爾羌諸水渚為蒲昌海即

鹽澤蒙古語謂之羅布淖爾伏流地中復出為星宿海云云今覆閱史記漢書所記河源為之究極原委則張騫所窮正與今所考訂相合又豈可沒其探本討源之實乎所有兩漢迄今自正史以及各家河源辨證諸書允宜通行校閱訂是正訛編輯河源紀略一書四十九年兩江總督薩載河道總督李奉翰奏江南河工預籌修防蓄洩機宜繪圖請示旋

諭薩載李奉翰奏江南河工預籌修防蓄洩機宜辦理
工程三處繪圖貼說具奏已於圖內詳晰批示並面
諭該督等遵辦矣天然閘下既舊有引河年久淤墊
理應一併疏浚深通以備盛漲之年開放分洩自當
首先辦理方為有備無患其所奏外河順黃壩隄工
後深塘用土填平並於迤下佔築新隄一道自應次
第辦理以資保障至該督等所稱高堰石工子堰尾
土尚矮湏一律加高培厚一節高堰石工既經加高

層數其土堰間有卑矮之處自應一律加高培厚接成一勢並應栽種柳樹俾根株盤結更可永遠鞏固此事與前在海寧令將柴塘石工中間積水溝槽墊平以資重障之旨事同一例應定為再次辦理將此分晰指示該督等其仰體朕意遵照妥辦所需錢糧著照所請於兩淮運庫內撥用又江西巡撫伊星阿奏南昌新建等六縣下游地接鄱湖又當章貢諸水之衝而圩隄沖塌田禾被淹請動項修築從之

五十年大學士阿桂等奏接奉

上諭前因桐栢山為淮水發源特諭畢沅詳晰查勘支
流或有淤塞即應設法籌辦茲據畢沅覆奏該處發
源之地河身不甚寬廣易於疏浚倘有需開挖之處
即勘明興工又賈魯惠濟兩河即係淮水支河現在
一律疏濬江南洪澤湖向藉淮水挹注今淮水發源
之處經畢沅勘明疏濬將支港小河一律浚導該處
賈魯惠濟二河其下流歸并渦河入淮現在亦加疏

浚俾就通暢并於淮瀆廟虔申祭告自當仰邀

靈佑泉源湧發衆水會歸下游湖水日就充足以助清
敵黃伏查淮河清水禦黃濟運為全河最要關鍵今
歲淮水未經大長仰蒙

聖明遠照以桐栢山為淮水發源

諭令畢沅廣為濬導從此會流下注洪湖自必日就充
足暢出清口永資利賴河南巡撫畢沅奏賈魯河
即在古汴水發源滎陽之大周山會京寧等水經

鄭州中牟祥符至朱仙鎮下達尉氏扶溝西華淮
寧之周家口商水項城沈邱至安徽之潁州正陽
關入淮又賈魯河自中牟縣西十五里分支為惠
濟河經祥符陳留杞縣睢州柘城淮寧鹿邑至安
徽亳州金陽河入淮各計四百餘里此河淤塞為
開封等府屬商販民食攸關今久經淺淤自應及
時開浚且於水旱年時兼可以資蓄洩從之又雲
南巡撫劉秉恬疏言滇池在省城之南周圍三百

餘里受昆明六河之水會為巨浸附近昆明呈貢
晉寧昆陽四州縣環海田疇資以灌溉者不下數
百萬頃所恃以宣洩者惟在昆陽之海口大河為
滇池出水咽喉疏通均受其利壅遏即受其害應
自龍王廟至石龍壩共長二千七十五丈挖深一
二尺至四五尺不等從之

皇朝通典卷五

欽定四庫全書

皇朝通典卷六

食貨

六

水利下

海塘

順治元年禮科給事中張惟赤疏言海塘自明末至今未修請仍限歲修以防潮患於是修海鹽縣

塘二十一丈二年增修六十丈

謹按海塘自前明崇禎二年同知劉

元瀚建修海寧捍
海塘後不復修

康熙三年海決築海寧縣塘次年九月石堤成并
築尖山石隄五千餘丈九年設浙江海防同知二
人專司塘務三十八年修錢塘江塘四十年修錢
塘江岸築石塘温州府同知甘國奎請每塘一大
用石一縱一橫固以油灰鎔鐵錠鑲嵌石縫深根
堅杵加築子塘以為重障布政使趙申喬請專委
國奎修築經始於本年秋四十五年春事竣建石
塘六百六十七丈子塘八百九十五丈四十一年

江塘圯布政使郎廷極築之建潮神祠於上五十四年修海塘三千三百九十七丈五尺五十五年重築江塘布政使段志熙董築其法用石一縱一橫每層鑿孔貫以巨木每五六石聯為一石以鎮壓水勢又於橫直合縫之處各用鐵錠嵌扣成塘二十丈五十七年修築海寧石塘濬備塘河巡撫朱軾建築其法每塘大用木櫃二每櫃貯石塊五十斤

其竹筴法亦如之

為塘基外築坦水復開備塘河建

開一座五十九年巡撫朱軾請于老鹽倉築魚鱗石塘開濬中小鹽淤沙令海防同知司歲修事從之是年分修海寧塘六十一年改築草塘

雍正元年濬赭山口三年

命吏部尚書朱軾建修海寧縣陳文港亂石塘三千八百

丈并修補子塘

時浙江巡撫石文焯初請用石修築旋疏不必用石中無定見故違

尚書朱軾往勘建築

五年巡撫李衛請增築浦兒兜草壩并

改建姚家堰草塘從之

姚家堰舊建土隄

是年復修海寧

縣錢家坂馬牧港等處塘工又修江塘六年修海

寧縣老鹽倉西塘南門外海塘錢塘江塘七年

命建海神廟

在海寧縣東門內

又改建海寧縣荆煦廟等處石塘

向係草塘後改土塘今建石塘

築陳文港等處草壩八年築海寧

西塘大壩設海防兵弁鑄鎮海鐵牛五座又修仁

和縣塘九年續修海寧錢塘塘工十年築仁和沈

家埠海寧華家街草塘十一年

命內大臣海望查勘浙江海塘嗣據海望疏言海寧之東

南尖山聳峙海口與西塌山水底石脚相連兩山相去僅百餘丈舊有石壩堵截後因築塘誤取其石致江水大溜直趨兩山之間引入海潮衝激塘身應仍築石壩一道以堵江溜從之又

命於中小壘開引河一道分江流入海以減水勢增設道員一同知一守備二千總三把總七兵八百專司隨時修補又修仁和錢塘平湖諸邑塘岸十二年濬南港河築尖山西浮壩十三年總督程元章疏

定海塘事宜四一錢糧宜分案具領一分別保固
年限一令承修官會同估造一於緊要工所預貯
物料從之增築魚鱗石塘葺浦兒甕舊塘添建海
寧南門外魚鱗石塘又定攻沙法大學士嵇曾筠
疏言寧邑塘工之患雖在北岸而致患之由實由
南岸沙灘沙觥挑溜遂至水勢全向北趨請用借
水攻沙之法於南岸沙洲用鐵具梳控陡岸俾沙
岸根脚空虛海潮來往自為衝刷坍卸以洩水勢

從之

乾隆元年建築仁和海寧魚鱗石塘六千餘丈并
海寧南門石塘設運石海船五十隻二年編石塘

草塘字號

向例各塘冊姓率以某家東西起止開
報易于滕混雍正年間監督汪澄張坦

麟等議將各塘編立字號至是大學士嵇曾筠咨
部將各塘照千文編號以二十丈為一號建暨界
碑仁和計編七十二號海寧編六百
四十號其餘海鹽等塘均照此例

改建海寧遠

城坦水四年停草塘歲修時撫臣盧焯以水勢日
南漲沙綿亘數十里刮涵煎鹽已成原野疏請罷

之改建浦兒兜等處石工續築尖山未竣壩工

前大

學士嵇曾筠因水勢險急難以堵塞疏請暫停
茲撫臣盧焯以水勢已平合龍甚易疏請補築復

濬備塘河興築仁和錢塘江海塘埭五年續建東

塘石工是年尖山水口成

乾隆二年經始

鑄鎮海鐵牛四

座六年總督德沛復請老鹽倉迤西至仁和縣之

章家菴柴塘改建石工從之

命左都御史劉統勳查勘浙江海塘

先是五年十一月
德沛曾有是請部

議准行以劉統勳言改建不必過急
乃緩興築至是復請故仍遣會勘七年總督那蘇

圖疏言章家菴至海寧縣之華家街舊築柴塘外沙綿漲數里不必改建石塘惟老鹽倉汛至東石塘界地俱頂沖請擇其最險之觀音堂汛坐字號老鹽倉汛伏字號及益字等號建築竹簍石壩是年左都御史劉統勲疏言親履南北兩岸柴塘改建石塘誠經久之圖請俟水緩沙停乘機興築每年以三百丈為率督臣邵蘓圖復疏言老鹽倉汛至東石塘界最險請先間段排築石簍俟石簍根

脚堅實再照原議改建石塘均從之九年

命吏部尚書公訥親赴浙江勘修塘工尋疏言仁和海寧柴塘外護沙寬廣不必改建如慮護沙坍塌請

將中心疊故道開濬俾潮水安循出入上下塘俱

可安堵部臣議准遂罷改建石塘議是年海寧魚

鱗大石塘工成

乾隆二年經始

十二年濬中小疊工成十

三年增築護塘土堰又議增滾壩及塘汛弁兵十

五年海潮平

謹按海水自乙丑歲以來大溜直趨中壘至是年秋海波不揚臣民慶幸

冬十二月撫臣永貴以秋汛安瀾塘工穩固疏聞

十六年

上巡幸江浙莅錢塘江

幸六和塔敬念

世宗憲皇帝奠安之德勒石紀事永示無極十八年海潮

平十九年督臣喀爾吉善請裁改海塘營官弁

海江

塘工向設兵備道一員統率守備二員千總四員把總八員外委六員馬步兵千分守防護至是以尖山石壩告成中小壘引河暢流塘工穩固裁汰道員歸杭嘉湖道專管其守備以下官兵均令裁改留堡夫四百名三百名守北岸一百名守南岸餘兵改歸杭乍二營

二十二年

上巡閱海塘

幸觀潮樓

命建海神廟於城南明年廟成

御製碑文勒石二十四年酌復海塘營弁兵

復千總一
把總二外

委三馬兵二十步戰兵六十守兵百三名海寧
分設二汛舊設堡夫悉行裁汰統歸兵額

加築

護塘土堰

時撫臣莊有恭言海寧石塘近
城一帶護河冲塌故有是築

增築層

石坦水修海寧條石坦水

時江流海潮復改
由北大壘出入

二十

五年修東西塘坦水及韓家池柴塘復修築海寧

南門外諸坦水

時海寧南門外及石門遠城塘外二層坦水為五月望汛潮損故復

修

二十六年修胡家兜坦水

時潮水逼塘護沙全刷地當頂沖故建之

修魚鱗石塘坦水

自雍正八年建後已歷年久今外無護沙故改建

修馬

牧港塘工坦水築秧田廟坦水修韓家池柴塘

以均

潮汛沖塌獲沙故修

二十七年

上巡幸浙江躬閱海塘咨度經久之計建築石塘因試

下木椿始苦沙澀旋築以鉅碇所入不及寸許逮

椿下既深又苦沙散不能齧木其柴塘向內數十

丈土地似宜下椿可以即工然所在皆田廬溝塍
鱗次櫛比乃

命築柴塘定歲修坦水又改築四里橋魚鱗石塘並華
岳廟等處石塘盤頭坦水二十八年改建念里亭
諸處魚鱗石塘二十九年置老鹽倉護竹簍增築
念里亭坦水三十年

上以海寧全城環遶石塘止建坦石兩層潮勢侵逼外
沙恐有汕刷之勢

命普築三層坦石並隨時修整以資防護四十三年修築浙江仁和海寧等處柴塘四十五年

上五次南巡親勘塘工以柴塘雖尚完整究不如石塘鞏固因

命該督撫董率所屬自海寧城東至陳文港修石塘百六十餘丈迤上老鹽倉柴塘四千餘丈通建魚鱗石工旋

遣大學士阿桂往浙江閱勘工程四十七年總督陳輝

祖奏西塘頭圍為江海交接之處漲沙十餘里橫
江截海隔阻水道致范公塘以東漸致搜刷章家
菴迤西冲擊灘塢遂於頭圍沙灘開引河一道待
山水暴注時開放借山水奔騰之勢順流攻沙會
春雨漲大溜直趨引河西岸冲塌寬深范公塘正
溜開向南行漸有南坍北漲之勢四十八年老鹽
倉石塘工竣又奉

上諭浙江范公塘一帶看來竟須一律改建石塘以資

捍衛昨已諭知富勒渾等矣明春南巡時朕親臨閱
視指示機宜降旨後即可興工辦理至富勒渾有老
土塘根脚同係淤沙土性浮鬆之語從前老鹽倉一
帶亦稱沙性浮鬆難以開槽打樁乃自建石工一律
穩固堅實可見事在人為該處改建石工所費不過
較前三分之一方今府藏充盈即多費數十萬帑金
捍衛民生使閭閻永臻樂利亦所不靳也四十九年
上南巡親閱工程

諭普築魚鱗石塘所以保障民生關係甚重今所辦工程多未協之處石塘既建自應砌築坦水保護塘根乃考之督撫惟云柴塘必不可廢此受工員慫恿為日後歲修冒銷地步況此番添建石塘原欲留柴塘以為重門保障並未令拆去柴塘若如該撫所言復加歲修又安用費此數百萬帑金為耶又石塘之前柴塘之後見有溝槽一道槽內積水並無去路將來日積日甚石塘根脚勢必淹浸滲漏該督撫亦並未

慮及其石塘上堆積土牛甚屬無謂設果遇異漲又豈幾尺浮土所能抵禦所有塘上土牛即著填入積水溝槽之內仍將柴塘後之土順坡斜築祇露石塘三四層為度并於其上栽種柳樹俾根株蟠結如此柴石連為一勢即以柴塘為石塘之坦水至范公塘一帶亦必需一律接建石工方於省城足資永遠鞏護著自新築石工止處及挑水段落起至硃筆園記處止再接至烏龍廟止一體添築石塘再撥部庫銀

五百萬兩仍予限五年分段修築以期海疆永慶安
瀾

臣等謹按浙省海塘自章家菴至老鹽倉一帶乾隆四十五年我

皇上親臨閱視

命建石塘四千九百丈四十九年又蒙

聖明指示將柴塘所空溝槽填土種樹俾柴石兩塘合為一勢即以舊有柴塘為坦水表裏完固其章家

菴以西至范公堤一帶續奉

諭旨一律添建石塘內章家菴以西石塘工尾起至范公塘迤東

硃筆圈記處二千一百一十丈形本兜灣又有上游桐廬各處山水自南而來適當其衝是以原定添建時列為急工並

命於石工告竣亦即以新建柴工為坦水將來自范公塘東至老鹽倉綿亘數十里俱有重門保障益仰

聖明計出萬全億萬年鞏固之鴻規無非千百萬帑金之實效至范公塘以西

硃筆圈記處烏龍廟一帶二千九百三十丈原定添建時即列為緩工五十一年復

命大學士公阿桂覆加察勘尋疏言該處老土塘從前建築時即向東北以漸收進而老土塘迤西之江塘又自北斜向東南建築挑溜南趨居民復於老土塘之外添築土塘一道即名范公塘廬舍桑麻

鬱然在望范公塘外沙塗亦有寬至千餘丈者詢之在塘年久之弁兵等僉云數十年來從未見有刷動等語臣親加履勘既非

硃筆圈記以東水勢直抵塘根者可比此一帶大溜亦無漸次逼近之勢所有原定石塘緩工二千九百餘丈應暫行停止將原定急工二千一百一十丈內已經開工之一千五百丈及未經開工之六百餘丈均已接續興建再將外衛之柴工透過石塘

工尾往西接續二三百丈並遵

旨於

硃筆圈記處塘外添築挑水大石壩一座實已足資保護至於塘外沙塗坍漲無常若向後常得南坍北漲塘工離水益遠自是極好機會北岸現有沙塗雖從未見刷動倘大溜漸有趨近之勢應交與撫臣隨時留心察看萬一將來有須改建石工之處再一律改建奉

旨如所議行從此海疆永慶安瀾洵億萬年金堤鞏固
之長策也

皇朝通典卷六

欽定四庫全書

皇朝通典卷七

食貨

七

賦稅上

田賦

丁銀

蘆課附

臣等謹按九等之賦載在夏書九職之供詳於周禮皆所以明取民之制也沿及後世代有重輕及明末造厲政不一而其甚者莫如遼餉勦餉練餉三事民不堪命我

朝掃除底定首除三餉及召買糧料諸弊頒行賦役
全書釐正徵收定額嚴禁加徵火耗凡有輸納令
民親行投櫃設立聯票以杜胥吏滋擾凡所以厚
下卹民者計至周矣而且以康熙五十年錢糧冊
內有名丁數垂為定額其滋生人丁另冊編造永
不加賦謂之

盛世滋生冊此誠自古帝王所未聞之盛典而我
國家億萬世休養生息之政源也含哺鼓腹耕鑿何

知茲纂通典謹編輯田賦以彰

昭代惠養元元之政焉

田賦

田賦有二曰民田曰屯田皆分上中下三則有本
徵者有折徵者有本折各半者本徵曰漕漕有正

糧有雜糧

正糧米雜糧豆
麥蕎麻等類

折徵者始定以銀繼則

銀錢兼納

直隸田賦每畝科銀八釐一毫至一錢三分零不

等米一升至一斗不等豆九合八抄至四升不等
更名田每畝科銀五釐三毫至一錢一分七釐三
毫不等農桑地每畝科銀一釐六毫八絲零蒿草
籽粒地每畝科銀五分至七錢二分五釐一毫不
等葦課地每畝科銀一分至六分不等歸併衛地
每畝科銀七毫二絲至七分九釐三毫不等米八
合九勺七抄至九升七勺二抄不等豆四合三勺
八抄至三升六合不等草一分

每十分
為一束九釐二毫

至四分一釐不等河淤地每畝科銀二分九釐至
二錢五分六釐五毫不等學田每畝科銀一分至
二錢六分七釐八毫不等小麥粟各六升

盛京田賦每畝科銀一分至三分不等米二升八勺
至七升五合不等退園地每畝科銀一分至三分
不等豆四升三合至一斗不等

山東田賦每畝科銀三釐二毫至一錢九釐一毫
不等麥一勺至四合三勺不等米二勺至三升六

勺零不等歸并衛所地每畝科銀一分至六分五釐零不等更名田每畝科銀一分至三錢七毫零不等麥三合二勺零米一升八合零學田每畝科銀九釐至三錢不等竈地每畝科銀二分六釐五毫至四分四釐一毫不等麥一勺至四合一勺零不等米一升八合至二升八合四勺零不等衛所軍屯糧田每畝科銀一分至五分三釐八毫零不等條銀一分二釐至二分四釐不等衛所更名籽

粒等地每畝科銀六釐至一錢二分不等

山西田賦每畝科銀一釐七絲至一錢零不等糧
一合五勺至二斗七升不等屯地每畝科銀二釐
三毫至一分四釐零不等糧一升八勺至一斗九
合零不等更名地每畝科銀五釐至一錢四分不
等糧七勺至二斗不等衛所屯地每畝科銀一分
四釐

河南田賦每畝科銀一釐四毫至二錢二分七釐

不等米七勺至二升二合不等更名地每畝科銀
一分一釐至一錢二分九釐不等歸并衛所地每
畝科銀一釐六毫至一錢八釐零不等

江蘇田賦每畝科銀九釐至一錢四分一釐零不
等米豆一升四合七勺至一斗九升二合六勺零
麥二抄至三勺零不等地每畝科銀九釐至三錢
三分三毫零不等米豆七合三勺至四斗一升六
合九勺零麥一抄至八勺零不等山蕩淒灘每畝

科銀九釐至一錢四分五毫零不等米豆三合四
勺至一斗六升五合二勺零麥一勺至三勺零不
等城基倉基屋基每間科銀五分七釐至一錢二
釐四毫不等米豆五升五勺至一斗二升六合三
勺零麥一勺至二勺零不等歸并衛所地每畝科
銀九釐至一錢四分一釐一毫零米豆一升四合
七勺至一斗九升二合六勺零麥二抄至二勺零
不等

安徽田賦每畝科銀一分五釐至一錢六釐零不
等米二合一勺至七升一合零不等麥五勺至八
勺零不等豆八勺至九合一勺零不等地每畝科
銀八釐九毫至六錢三分零不等米七合九勺至
五升九合零不等麥八勺至二合二勺零不等塘
每畝科銀一錢九釐至四分四釐零不等米四合
七勺至七合八勺零不等麥一勺至二勺零不等
草山每里科銀八分三釐桑絲每兩折銀三分二

釐歸并衛所屯田每畝科銀一分至六分不等糧
一升八合至八升六合不等衛所管轄屯田地每
畝科銀一分七釐九毫至二兩七錢二分二釐九
毫零不等糧三合至二斗五升四合一勺零不等
江西田賦每畝科銀一釐三毫三絲六忽至一錢
一分七釐一絲三忽零不等米一合四勺至一斗
七合二勺五抄零不等地每畝科銀五絲四忽至
二錢一分一釐一毫二絲八忽零不等米五勺二

抄至五升一合二勺八抄零不等山每畝科銀五
忽至六分二釐七毫二絲零不等米一勺七抄至
一升四合七勺八抄零不等塘每畝科銀五絲四
忽至二錢七分六毫七絲七忽零不等米一合一
勺三抄至六升八合三勺七抄零不等歸并衛所
屯田每畝科糧三升九合五勺九抄至二斗七升
三合零不等每石折銀五錢每石又攤徵餘徭等
銀二釐九毫七絲五忽至四分八釐三毫八絲四

忽零不等歸并衛所屯地每畝科糧七升九合七勺三抄至二斗二升八合三抄零不等每石折銀二錢歸并衛所餘田每畝徵餘糧銀四分一釐六毫六絲零自福建省改歸屯田每畝科銀九分四絲七忽至一錢一分四釐二毫四絲五忽不等

福建田賦每畝科銀一分六釐九毫至一錢六分二釐五毫零不等米一勺九抄至二升四合七勺

零不等官折田園地

自明代相沿凡職田沒官田官租田廢寺田不徵糧米止

徽州色曰官
折田園地

每畝科銀八釐七毫至四錢一分七釐五毫零不等學田每畝科銀六分四釐三毫至六錢九分九釐五毫不等

浙江田賦每畝科銀一分五釐三絲至二錢五分五釐不等米三勺至一斗九升零不等地每畝科銀二釐四毫至二錢一分三釐二毫不等米八抄至一斗九升三合五勺零山每畝科銀五絲至一錢九分六釐三毫不等米六抄至五升三合七勺

不等蕩每畝科銀四毫至七分三釐不等米五勺
至七升五合不等塘每畝科銀二毫至一錢二分
四釐五毫不等米七撮至一升六合八勺不等湖
地每畝科銀三分七毫米九勺五抄桑每株科銀
一釐九毫至五釐六毫不等米一抄茶每株科銀
一釐五毫米七勺竈地每畝科銀一分六釐一毫
至一錢四分一釐四毫不等米三合七勺至三升
七合不等歸并衛所田地每畝科銀五釐七毫二

絲至一錢四分九釐零不等米一斗五升七合五勺至二斗四升零不等

湖北田賦每畝科糧六抄至二斗九升一合四勺八抄零不等每石徵銀二錢五分四釐五毫至二兩九錢七分四釐一毫零不等更名田地每畝科糧四合九勺九抄至六升三合一勺不等每石徵銀四錢六分六釐歸并衛所屯地每畝科糧一升五合至九升九合六勺零不等衛所管轄屯地每

畝科糧一升二合至一斗八升不等每石徵銀三錢至一兩三錢一分六釐六毫零不等

湖南田賦每畝科糧二勺九抄四撮至一斗四升六合九勺零不等每石徵銀二錢二釐三毫八絲至一兩八錢四分四毫不等更名田地每畝科糧五合至一斗二升不等每石徵銀三錢七分三釐五毫至九錢二分四釐四毫不等歸并衛所屯地每畝科銀一釐九毫至一錢四釐三毫不等糧三

合八勺至二斗不等每石徵銀一錢七分七釐四毫至一兩六錢五分三釐一毫零不等岳州衛管轄屯田塘每畝科糧一升至一斗二升五合不等每石徵銀五錢六分苗疆地每畝科銀一釐五毫至三分六釐七毫九絲零不等

陝西田賦每畝科銀二兩三錢八分一釐七毫糧五升八合五勺至五升二合五勺不等屯地每畝科銀二釐至九分八釐不等糧一升五合至三斗

不等更名地每畝科銀六釐九毫至七分五釐一毫零不等糧四升三合五勺至一斗四升八合零不等

甘肅田賦每畝科銀二毫至一錢五分四毫零不等糧三勺至八升一合一勺零不等草三分至四分六釐零不等歸并衛所屯地每畝科銀一釐二毫至六釐不等糧五升至六升不等更名地每畝科銀四釐八毫至一分七釐一毫零不等糧二合

二勺至一升四合二勺零不等草一分至九分二釐不等土司地每畝科銀七分五釐零糧二升四合二勺五抄零衛所管轄屯地每畝科糧四升一合八勺七抄零草五分八毫零番地每畝科糧四合至三升不等草二分一釐五毫至三分不等每戶輸銀三錢糧一斗至二斗五升不等監牧地每畝科銀六釐

四川田賦每畝科銀一釐五毫七絲至八分四釐

九毫一絲零不等糧每斗折銀四分估種每石徵銀七分一釐二絲至七錢一分二釐零不等歸并衛所屯地每畝科銀一分二釐五毫至三錢不等糧二斗七升二合七勺零每糧一石徵米五斗并八斗不等土司地每畝科銀三釐四毫至二分三釐一毫零不等衛所管轄屯地每畝科銀一分二釐五毫至二分不等米豆一升九合二勺九抄至八斗不等

廣東田賦每畝科銀八釐一毫至二錢二分三釐
二毫零不等米六合五勺至二升二合九勺零不
等歸并衛所屯地科銀照民地科則米每畝八升
八合八勺沉溝每條科銀四錢五分三毫零車池
每方科銀三錢九分四釐零

廣西田賦每畝科銀二分四毫至二錢一分二釐
二毫零不等米三升七合至五升三合五勺不等
官田每畝科米六升四合二勺至二斗七合七勺

不等徭田每畝科米三升至五升三合五勺獐田
每畝科銀九釐至二分二釐三毫不等米三升七
合四勺至五升三合五勺不等狼田每畝科銀九
釐米四升二合八勺學田每畝科銀九釐米二斗
四升八合四勺

雲南田賦每畝科銀五釐五毫至四分六釐五毫
零不等糧一升九合四勺至一斗五升零不等歸
并衛所屯地每畝科糧五升九合二勺至八升一

合八勺零不等馬場地每畝科銀三分夷地每畝
科糧一升

貴州田賦民苗田俱每畝科銀一分至六錢五分
不等米五合一抄至四斗五升不等豆一斗土司
田每畝科銀八釐至一錢不等米七合二勺二抄
至一斗五升不等官田每畝科米二斗五升至五
斗不等歸并衛所屯田每畝科銀一分四釐一毫
至二錢三分四釐不等米五升三合五勺至三斗

七升三合三勺零不等豆三斗蕎二斗三升三合
三勺至三斗一升一合四勺零不等學田祭田每
畝科銀一錢至四錢不等米二斗至四斗不等穀
二斗至一石一斗七合八勺零不等租地每畝科
銀三分至一錢不等山土每畝科銀一分三釐六
毫至五分不等米五升蕎一斗旱祭田每畝科銀
一錢豆一斗官莊賑卹田每畝科米一斗四升九
合至五斗不等穀四升一合三勺至二石二斗五

升一合二勺零不等

臣等謹按直省州縣科則多寡不一詳載賦役全書茲謹照會典所載舉其大凡至新疆田賦已雜見於新疆屯政篇不備載

順治元年

諭曰前明厲政莫如加派遼餉以致民窮盜起而復加勦餉再為各邊抽練又加練餉惟此三餉數倍正供更有召買糧料始猶官給以銀繼則按糧攤派官吏短價尅

扣書役勒索追比名為當官平市實則計畝加徵民無
控告殊可憫恤自茲以後凡正額之外一切加派盡行
豁除如有官吏朦混倍徵者殺無赦定各款錢糧彙解
例

時解京錢糧頭緒紛雜有正項止三千餘兩而條分四十餘項者故設此例

嚴加徵

火耗之禁八年蘇松巡撫秦世桢疏言八事一田

地令業主自丈

見田制篇

一額定錢糧俱填易知單設

有增減分給小單以防侵蝕一由單詳開總散數
目花戶名姓以便磨對一催科不許濫差衙役設

立滾單以次追比一收糧聽里戶自納簿櫃俱加
司府印封以防抽換一解放先急後緩勒限掣銷
毋許存留胥役之手一民差按田均派與排門冊
對驗無使不均一備用銀兩不得預支從之令廣
東屯糧本折各半徵收十年令江南秣陵廣武英
武三衛屯糧准其折色十一年

欽定賦役全書

謹按賦役全書順治三年纂凡在京各衙門錢糧項款原額及見在收支銷算數目

在外直省錢糧見在熟田應徵起存數目均載入頒行每年令布政司將開墾荒田及增減戶丁實

數訂入至是
復行訂正
十三年

命戶部侍郎王宏祚將直省額徵起存總散實數編撰成帙凡有參差遺漏者悉行駁正其明季加派陋規豁免未盡者概行蠲除至漕白雜項或改折或本色俱細加清核編勒成書頒示天下於是賦役全

書外又有會計冊赤厯丈量冊黃冊諸書

會計冊備載州

縣正項本折錢糧及起解交部日期解戶姓名以杜侵欺并清積欠赤厯載戶口錢糧數目每年頒發二扇一備膳真一備百姓自登納數令布政司歲終磨對丈量冊載天下田土凡原隰墳壤下濕

沃瘠沙鹵或具馬黃冊則準于戶口詳其舊管新
收開除寔數條為四柱與賦役全書相為表裏

行一條鞭法頒易知由單

一條鞭法以府州縣一
歲中夏稅秋糧存留起

運之額通為一條總徵而均支之至運輸等事皆
官為支撥而民不與由單之式以每州縣上中下

地正雜本折錢糧開列總數刊成定式於開徵之
前給花戶使民通曉此外又有截票印簿循環簿

糧冊奏銷冊截票之法開列實徵地丁錢糧數目
分為十限每月限完一分截票其票用印鈐蓋就

印字中分為兩半給納戶執憑半留庫櫃存驗即
所謂串票也印簿由布政司頒發令納戶親填入

簿季冬繳司報部糧冊裁各區納戶花名細數務
與一甲總額相符易於摘比循環簿照賦役全書

款項急者居先緩者居後按月循環徵收奏銷冊
以各省錢糧支解完欠按年分款彙造清冊歲終

送府由府送嚴徵收加派之禁十五年御史許之
部核以考核

潮疏言財賦之害莫大於蠹役官以叅罰去而蠹
役歷久尚存前無所懲後無所戒故所侵蝕每至
盈千累萬而不知止請將從前侵蠹姓名數目清
查籍其家業多者坐以大辟少者流配以清蠹源
從之十六年令州縣設徵收櫃凡徵收時各置木
櫃排列署門令納戶眼同投櫃以免剋扣工科給
事中陰應節疏言錢糧四弊一州縣挪移一紳士

包攬一土豪冒名紳士一隔縣寄莊抗糧請嚴查懲禁從之

康熙二年工科給事中吳龍疏言直省解京各項錢糧

國初原總歸戶部自順治七年令各部寺分管催收以致款項繁多易滋姦弊請以一應雜項俱稱地丁錢糧作十分考成除扣撥兵餉外其餘通解戶部各造簡明賦役冊其易知由單頒給民間者盡

除別項名色各部寺應用錢糧即向戶部支給從之四年革隔年預徵之例凡錢糧均以夏秋分徵申加添火耗之禁六年

上以由單款項繁多小民難以通曉令嗣後只開上中下等應徵銀米實數其湖廣陝西二省糧石派徵本折數目向未開載令照例填注七年

諭戶部收納直省起運錢糧督撫不得縱容司道書吏勒

索苦累解官

謹按州縣經徵錢糧運解布政使司候部撥日起運

直隸起運銀百九十一萬三千四百九十一兩四錢八分九釐有奇

盛京起運銀二萬六千三十一兩六錢一分七釐七毫有奇

山東起運銀二百七十八萬一千六百四十七兩六錢二分八毫有奇

山西起運銀二百五十九萬三千五百十有七兩六錢五分八釐有奇

河南起運銀二百七十三萬八千二百五十兩三錢六分

江蘇起運銀百八十九萬八千九百九十一兩有奇

安徽起運銀百三十七萬九千五百十有二兩有奇

江西起運銀百五十七萬一千三百二十兩一錢九分有奇

福建起運銀百有三萬七千六百十有八兩五錢二分有奇

浙江起運銀二百十有四萬五千八十三兩二錢八分有奇

湖北起運銀八十二萬三千百有二兩七錢有奇
湖南起運銀九十萬二千五百十有七兩六錢六分有奇

陝西起運銀百三十五萬六千三百五兩一錢五

分有奇

甘肅起運銀十有九萬一千五百九十三兩四錢二分有奇

四川起運銀四十九萬三百六十四兩一錢八分有奇

廣東起運銀八十四萬一千三百七十二兩有奇
廣西起運銀二十九萬六千三十五兩七錢三分有奇

雲南起運銀十有六萬六千二百一兩六錢五分有奇

貴州起運銀七萬五千四百八十九兩五錢九分

有奇

以上起運銀數均謹按會典則例載入

二十八年申定截票之

法

裁票始于順治十三年一票而中分之一給納戶一存庫樞每逢比較察驗有票者免催未截

者追比行之既久姦胥或藉磨對為名將納戶所繳之票強留不給遂有已完作未完多徵作少徵者今定三聯印票一存州縣一付差役應比一付花戶執照徵收數目每票填寫如州縣勒令不許填寫及無票付執者許小民告發以監守自盜律科罪

停歲造赤厯冊

黃冊會計

冊俱於十
年停止

令各州縣日收錢糧流水簿於歲底同

奏銷文冊齋司磨對三十年令直省各州縣衛所

署門均勒賦役全書科則於石使民悉知三十九

年設立滾單

滾單之法或五戶或十戶用一單於納戶名下注明田畝若干該銀米若

若干春應還若干秋應還若干分作十限每限應完若干給甲內首名挨次滾催令民自行投櫃不許里長銀匠櫃役稱收一限若完二限挨次滾催如有一戶沉單不完不繳察出究處四十二

年令截票分別注明漕項地丁數目毋許勝混徵

比五十二年

諭嗣後止將見在錢糧冊內有名丁數垂為定額其滋生

人丁另造清冊永不加賦

尋定新增者謂之
盛世滋生冊

雍正元年定凡州縣開徵之始令該府委員同封

銀櫃或十日二十日別委員拆封即解其存貯穀

石按季盤察出結轉報隱徇同坐二年

諭民間輸納錢糧用自封投櫃法亦屬便民之道但偶有
短少之處令其增補每致多索其數浮於所少之外理
應將原銀發還仍於原封內照數補足交納庶可免多

索之弊此雖細事督撫大吏亦不可不留心體察嚴飭有司以除民累三年更刊四聯截票一送府一存串根

截票一名串票一給花戶一於完糧櫃旁別設一櫃令花

戶完銀時自投櫃中每夜州縣官取出對流水簿

勾銷欠冊又定零星錢糧納錢之例凡一錢以下

小戶每銀一分準交制錢十文其大戶尾欠一錢

以下者亦如之又定附納之例凡小戶錢糧數在

一兩以下者附大戶投櫃於截票載明山西巡撫

諾敏布政司高成齡疏請提解火耗

上以州縣火耗原非應有之項因通省公費及各官養廉有不得不取給於民者今非不願天下州縣絲毫不取於民而其勢有所不能若各屬火耗酌定分數則將來竟為成額必至有增無減又以奏稱提解火耗將州縣應得之項聽其如數扣存不必解而復撥等語勢必額外加徵私行巧取浮於應得之數累及小民况解交督撫則顯然有據扣存州縣則難保貪廉未准議行十二

年

皇上御極之初

諭向來徵收錢糧因銀色有傾銷之耗折解送有路途之盤費故於正項外徵收耗羨原無定額廉潔者尚知自愛不肖者任意徵求經諾敏等倡為提解歸公之法各該督撫就本省情形酌定分數外絲毫不許濫徵蓋以耗羨原屬額外之項與其聽地方官私行徵取不如明定分數使有節制不敢違越也然在未

提解以前尚有私項既提解以後或恐不肖官員視同正課又得以耗羨之外巧取殃民從前

皇考洞見流弊屢降諭旨欲俟將來虧空全清府庫充裕之日漸減漸革

聖心厯念未或忘之朕紹承大統切念民依孜孜軫恤日與王大臣等悉心籌畫期使我民於正項之外絲毫無擾而一時勢有未能尚須從容計議惟是提解耗羨之法行之已十有餘年恐日久弊生奸吏夤緣腹

削耗外加耗重困閭閻不可不為深慮各該督撫其
咸體朕意知耗羨一項可減而決不可增可於格外
從寬而斷不可於額外多索再各省耗羨分數率在
加一上下然江南賦重之區如蘇松常鎮四府額賦
較之他省幾及數倍雍正六年以前每兩加耗僅止
五分雍正六年以後增至加一且有司又復巧取民
何以堪令量減分數徵收不得仍前重耗

乾隆元年

諭朕聞永平府屬州縣凡徵收錢糧皆以錢作銀每銀一兩連加耗羨銀一錢五分共折制錢千一百五十文今該處錢價昂貴民間納錢比之納銀為費較重朕思民間完納錢糧數在一錢以下者向例銀錢聽其並用原以便民若數在一錢以上又值錢價昂貴之時亦令交錢轉致多費是便民而適以累民殊未妥協嗣後在一錢以上者不必勒令交錢二年諭外省荒闢賦銀向例在於知府等官以下俸工內扣

除抵補朕念佐雜微員力量單薄不應在扣除之內
已於乾隆元年降旨諭令在督撫司道大員及府縣
正印官俸工內均攤抵闕今思官有崇卑役無大小
微員俸工既經免其攤扣其各衙門人役工食藉以
養贍其家若因荒闕扣除則餬口無資情有可憫此
項共計十二萬餘著准地丁項下全支免其扣荒定

浙江杭嘉湖三府屬南米隨同漕米十月起徵例

謹按南米向係春徵四分於秋季辦漕之後復令
催輸今以漕南二米分款交倉多形跋涉故改歸

十月隨漕米
分別免運

減湖南湘鄉瀏陽二縣賦準長沙縣

適中定額又減湘陰縣折色銀又

諭湖北所屬忠崇等土司田地應徵錢糧奉照原額秋

糧銀數按田均輸作為定額毋庸別立科則十二年

禁民人置買湖廣永順等處土苗賦輕田地

永順土苗

田地較之內地糧額輕減嗣因改土歸流
已入版圖民人利其糧輕產賤故有是禁

丁銀附

順天府十五萬四千百七十三兩有奇

直隸二百三十三萬四千四百七十五兩有奇

盛京三萬八千七百八兩有奇

江蘇三百十一萬六千八百二十六兩有奇

安徽百七十一萬八千八百二十四兩有奇

江西百八十七萬八千六百八十二兩有奇

浙江二百九十一萬四千九百四十六兩有奇

福建百七萬四千四百八十九兩有奇

湖北百十七萬四千一百十兩有奇

湖南八十八萬二千七百四十五兩有奇

河南三百十六萬四千七百五十八兩有奇

山東三百三十七萬六千六百六十五兩有奇

山西二百九十九萬六千七百七十五兩有奇

陝西百六十五萬八千七百兩有奇

甘肅二十八萬六千五百五十二兩有奇

四川六十三萬一千九百四十四兩有奇

廣東百二十六萬四千三百四十四兩有奇

廣西四十一萬六千三百九十九兩有奇

雲南二十萬九千五百八十二兩有奇

貴州十萬千六百二十八兩有奇

右謹據乾隆二十九年奏銷冊

開載

康熙三十二年令浙江湖北山東丁絕戶存丁銀
勾派地畝內帶征

雍正二年定直隸地丁銀賦攤征例每地賦銀一
兩攤入丁銀二錢七釐

臣等謹按丁隨地轉之例廣東四川已先行之惟奉天府民人入籍增減無數仍舊分徵至是年通行各省令行攤徵凡各州縣按丁多寡地畝廣狹分為差等每地賦銀一兩攤丁不過二錢使無業貧民永免催科有業民戶亦有定額不至多寡懸殊

蘆課附

按蘆地惟江蘇安徽江西湖北湖南五省有之其

地有草麥籽粒蕩灘熟田低田泥灘水光灘水影
荒白塗水窪基草荻草市地蘆墩埂划塘水套湖
塹白沙草塌地等名又有密蘆稀蘆上地中地下
地上草地中草地下草地中蘆田下蘆田蒹荻之
別均按畝分別徵收

江蘇計蘆地三萬四千三十頃七十三畝零課銀
十有二萬六千九百五十三兩五錢一分有奇

安徽計蘆地三萬一千四百八十五頃三十一畝

零課銀五萬一千三百四十七兩二錢四分有奇
江西計蘆地四千三百四頃八十七畝六分零課
銀六千二百六十八兩三錢六分有奇

湖北計蘆地八千四百八十九頃三十五畝二分
零課銀九千八百八十四兩二錢三分有奇

湖南計蘆地千六百三十六頃十有九畝二分零
課銀千三百二十九兩三錢五分有奇

以上蘆課
謹按會典

則例
載入

順治二年定濱海漲沙蘆地五年一文例分別坍漲增除十八年御史何可化疏言蘆課六弊一坍塌賠累宜豁一徵收解費宜革一豪強隱佔宜清一書吏飛灑宜禁一佃蠹侵欠宜究一蠲免條例宜溥工科給事中王曰高疏言蘆政四條一嚴催征以懲積欠一清踏勘以核實數一按地形以清課額一酌久任以專責成均從之

康熙二年除崇明縣大糧田蘆課銀

崇明縣大糧田九千六十

頃五十畝除正賦外復徵
蘆課一田兩賦故除之

十年停遣湖廣江南江

西收蘆課官歸併地方官管理

乾隆二十年定蘆洲地畝冊戶撥補例凡新漲地
畝遇有課之洲報冊者次第撥補其無課冊戶即
將撥補餘地按照報冊先後亦酌量撥給俟再有
餘始行開墾

皇朝通典卷七